

Kapiya Sën Jon Kevu Muginsën Vu Kerisi-yi-alam

Gagek Mala-tumsën-yi

¹ Ngaa sënë og yö nedo vu nyëmuğinsën. Lob he hango los halë rak malamin. Gehe hetung malamin rak gehe hebë nemamin rak meparah. Ngaa sën he nanër gagek rak agi, og yik yi mehö sën tu Gagek sën nevong behil nado malad-tumsën lo.

² Lob Mehö mala-tumsën-yi sagi tu mehönon rak, betök yam rangah, behe halë yi. Lob he nanër gagek yönon sënë rangah, banër vu ham bë nedo mala-tumsën degwata los degwata ving Ama. Rëk tu mehönon rak behe halë yi rak malamin.

³ Ngaa sën he halë los hango ggovek lo, sën he nanër rangah vu ham ving, in bë hil nid ga jak hil nabë sën he los Ama luho Nalu Yesu Kerisi nimin negga rak he agi.

⁴ Lob he kevü gagek sënë yök vu ham in bë hil ahëd nivesa rot gemaggin pin nama.

Hil Ana Jak Rangah

⁵ Lob gagek sën he hango banër rangah vu ham lo, yik nebë sënë: Anutu nesepa loğ ngaa rangah-yi mu, gağ ngaa malakenu-yi teka su neggëp vu yi rë.

⁶ Bë hil nanër nabë, “Alu Anutu nimin negga rak he”, rëk mu hil nesepa loğ ngaa malakenu-yi, og hil nehekuung rak, gağ hil su nesepa loğ gagek anon rë.

⁷ Gaḵ bē hil medo jaḵ ngaa rangah-yi nabē sēn yō nedo raḵ ngaa rangah-yi vorot lo, og hil nid negga raḵ hil vewen vewen, lob Anutu Nalu Yesu niḵōḵ yō medo neripek hil ngaa nipaya pin ya, gehil nid vesa nerak.

⁸ Bē hil nanēr nabē, “Saḵ su nehevong ngaa nipaya rē”, og sagaḵ hil ngo netetuhin ayod meris mu, gaḵ gaḡek anon su nare loḵ hil ayod rē.

⁹ Rēḵ mu nabē hil nanēr hil ngaa nipaya rangah vu yi, og rēḵ kevoh na, in yi og su nepekwē yi rē. Gaḵ yō nevong ngaa yohvu mu, om rēḵ jevu ngaa nipaya pin na in hil ayod gehil medo nid vesa.

¹⁰ Anutu nēr bē hil pin nehevong ngaa nipaya, om nabē hil nanēr nabē, “Saḵ su nehevong ngaa nipaya ti rē”, og sēnē nebē hil nemehoo yi gaḡek, benanēr yah raḵ yi bē yi mehō gaḡek tetuhinsēn, log yi gaḡek su neggēp loḵ hil ayod rē.

2

Kerisi Og Hil Mehō Sēn Nelok Vu Hil

¹ Nalug lo, sa nekevu ḵapiya sēnē yōḵ vu ham in bē ham su gwevong ngaa nipaya. Gaḵ nabē mehōti gevong ngaa nipaya, og hil Mehō sēn nelok vu hil menenēr hil gaḡek lo nedo ving Ama. Mehō sēnē og yiḵ mehō yohvu Yesu Kerisi.

² Yō diiḵ loḵ yah hil bed in bē kevoh hil ngaa nipaya na begaḡek ahē yes jaḵ in hil. Rēḵ mu su nevong huk sagi in bē doḵ vu hil mu rē, gaḵ nevong in bē doḵ vu alam pin sēn denedo yoh vu dob pin agi geving.

³ Nabē hil nesepa loḵ Anutu yi horek, og hil ajaḵ ni nabē hil naraḵ yi ni.

⁴ Log nabë mehöti nanër nabë nerak Anutu ni, rëk mu su nesepa lok Anutu yi horek rë, og yi mehö gägek kuungsën ala, gak gägek anon su neggëp lok ayo rë.

⁵⁻⁶ Gak nabë mehöti sepa dok Anutu yi gägek, og saga tato bë nesepa lok Anutu yi aggata ahëvingsën-yi yönon rot. Log mehöti sën nenër bë luho Anutu denedo revuh ti lo, og gevong ngaa pin noh vu sën Kerisi nevong lo, in mëm hil ajaç ni nabë luho Anutu denedo lok ti yönon.

Mehöti Sën Ahë Neving Ari Lo Lo, Og Nedo Rak Rangah

⁷ O sa mehö lo-e! Horek sën sa kevu vu ham-ë, og su mewis rë, gak yik horek muğeng sën yik yök vu ham wirek lo. Horek muğeng saga yik gägek sën ham ngo nyëdahis lo.

⁸ Rëk horek sën sa kevu vu ham agi, og horek mewis. In Kerisi yam nedo dob, lob sepa lok horek sagi beneggëp rangah, log ham nesepa lok ving. In malakenu maya geheng ya, berangah anon to dob beneggëp ya.

⁹ Log nabë mehöti nanër nabë nedo rak rangah, rëk mu nelë ari paya, og mehö saga yö nahën nesepa lok ngaa malakenu-yi.

¹⁰ Gak mehöti sën ahë neving ari lo, og nedo rak rangah, om ngaa ti su rëk gevong mebës rë.

¹¹ Gak mehöti sën nelë ari paya lo, og nesepa lok ngaa malakenu-yi. Nesepa lok ngaa malakenu-yi om neketul lok in aggata niröp, in ngaa malakenu-yi sënë neggërin mala.

¹² in Anutu kevoh ham ngaa nipaya ya rak Kerisi arë.

13 Log ham alam hib, sa nekevu gagek sënë yök vu ham,
in ham raḵ Mehö sën yö nedo wirek rot
menedo gwëbeng agi degwa ni.

Gesa nekevu gagek sagi yök vu ham hur magëm
sën ham kwesuu Mehö Nipaya Satan ggovek
ya lo ving.

14 Sa nekevu gagek yök vu ham hurmahen
in ham raḵ Amamin vu yagek ni nivesa.

Log sa nekevu gagek sagi yök vu ham alam hib
in ham raḵ Mehö sën yö nedo vu wirek rot
benedo gwëbeng agi degwa ni.

Gesa nekevu gagek sënë yök vu ham hur magëm,
in ham hur magëm los nimin wëëk,
lob Anutu yi gagek neggëp loḵ ham ayomin
beham kwesuu Mehö Nipaya Satan ggovek
ya.

Hil Su Ahëd Geving Aggata-dob-yi

15 Ham su ahëmin geving aggata-dob-yi los ngaa-
dob-yi pin. Nabë mehöti ahë geving aggata-dob-yi
rot, og su yoh vu bë ahë geving Ama vu yagek rë.

16 In hil arax ngaa-dob-yi pin sagi ni bë ngaa sën
hil navid nevongin lo, gengaa sën hil malad anon
in lo, gengaa sën hil nehako hil raḵ in lo, og su yam
vu hil Amad Anutu rë. Gaḵ yö verup raḵ aggata-
dob-yi.

17 Rëḵ mu ngaa-dob-yi los ngaa sën hil malad
anon in vu dob lo pin, og rëḵ mala nama na.
Gaḵ mehöti bë sepa doḵ Anutu aye, og rëḵ medo
degwata.

Alam Sën Denelë Yesu Paya Lo Deverup

18 Nalug lo-e! Gwëbeng og hil verup lok buk sën dob vongin govek na lo. Wirek og ham ngo gagek bë mehö sën nevongin bë dahun Kerisi na lo rëk berup. Lob gwëbeng og alam ngahi nebë saga detök yam rangah ggovek ya, om hil arak ni bë buk dus rak bevongin govek na.

19 Alam sën bë dedahun Kerisi na aga, og yik sir Kerisi-yi-alam nebë hil. Rëk dekehe sir vër in hil, om su hil alam sir niröp rë. Gak bë hil alam sir niröp, og rëk demedo geving hil rot. Rëk ma gedevuu hil ya, om hil arak ni niröp bë su hil alam sir rë.

20 Rëk mu Kerisi vong Anon Vabuung yök nedo ving ham, om ham pin rak gagek anon ni.

21 Sa su nekevu gagek sagi yök vu ham in bë mak ham dugin gagek anon rë! Gak sa nekevu in ham rak gagek anon ni vorot geham rak ni bë gagek anon og su nenër gagek kuungsën ti verup lok rë.

22 Mehö re gagek kuungsën ala? Gak yik mehö sën nelah Kerisi vun bë su yi mehö sën Anutu ggoo in rak in bë geço hil nah rë lo. Mehö saga og yik mehö sën nevong in bë dahun Kerisi na lo, lob neruu demi vu Nalu gevu Ama ving.

23 Mehöti bë geruu demi vu Nalu, og su Ama yi alam yi rë. Gak mehöti sën nenër rangah bë nevong ving Nalu lo, og Ama yi alam yi ving.

Anon Vabuung Netahu Hil Lok Gagek Anon

24 Gagek sën ham ngo wirek mugin lo, og ham ngo najom ahon. Nabë ham najom gagek sën ham ngo mugin lo ahon, og ham los Ama lu Nalu rëk medo jevuh ti.

²⁵ Lob nēr gagek vu hil benare vorot bē rēk gevong behil medo malad-tumsēn degwata los degwata.

²⁶ Sa nekevu gagek sēnē yōk vu ham in bē nanēr alam sēn vongin degekuung in ham aga tato vu ham.

²⁷ Rēk mu ham ko Anon Vabuung vu Kerisi ggovek ya benahēn nedo ving ham. Om ham su nesero mehō ngwē in bē tatekin gagek vu ham rē, gaḅ Anon Vabuung yō netatekin ngaa pin vu ham. Lob Anon Vabuung yi gagek og gagek anon, gaḅ su gagek kuungsēn rē, om ham najom gagek sēn netatekin vu ham lo ahon begwa jaḅ Kerisi.

²⁸ Yōnon, nalug lo! Ham ngo gwa jaḅ yi rot, loḅ mēm vu tamusēn sēn natōk nom rangah lo, og hil bare nid wēek los kwad vesa doḅ buk saga, gaḅ hil su agōneng in yi.

²⁹ Ham nerak Kerisi ni bē yi mehō yohvu, om ham jaḅ sēnē ni geving nabē alam sēn denevong ngaa yohvu lo, og detu Anutu nalu.

3

Gwēbeng Hil Atu Anutu Nalu Lo

¹ Alam-e! Ham kwamin bo nabē hil Amad Anutu ahē neving hil pangsēn rot, om sēn nenēr hil bē nalu hil lob sagak yōnon-Anutu nalu hil. Rēk alam sēn denesepa loḅ aggata-dob-yi lo, og su derak sēnē degwa ni rē, in sir dugin Anutu.

² Sa mehō lo-e! Gwēbeng sēnē hil atu Anutu nalu, rēk hil dugin sēn hil rēk nid nabē lo, in Anutu su tatekin meneggēp rangah rē. Gaḅ hil arak ni bē tamusēn, sēn Yesu rēk natōk nom rangah gökin lo, og hil rēk nid nabē yi, in hil rēk galē anon soḅek.

³ Log alam pin sën denevo kwaj in gagek sagi bë anon jak lo, og yö denegin sir bedenevongin bë denatu mehönon nijvesa rot nabë sën mehö nivesa Kerisi.

⁴ Gaḱ alam pin sën denevongŋŋaa nipaya lo, og denekeyëh horek, in ngaa nipaya og yikŋŋaa sën nekeyëh Anutu yi horek.

⁵ Lob ham rak ni bë Yesu og ngaa nipaya ti su neggëp vu yi rë, gaḱ töḱ yam rangah in bë geḱo hil ngaa nipaya nyëvewen vër in hil.

⁶ Mehöti sën negga rak yi lo, og su nesepa loḱ ngaa nipaya rë. Gaḱ mehöti sën nesepa loḱ ngaa nipaya yi aggata lo, og hil narak ni bë su nelë Kerisi rë, gesu nerak Kerisi ni rë.

⁷ Oo sa hur mahen lo! Ham gwegin ham in mehöti rëḱ tetuhin ham. Mehö sën yö nevongŋŋaa yohvu lo, og yi mehö yohvu nebë sën mehö yohvu Kerisi.

⁸ Satan ḱo ngaa nipaya rak nyëmuḱinsën be-medo nesepa loḱ, om mehöti sën nesepa loḱ ngaa nipaya lo, og Satan yi alam yi. Rëḱ mu Anutu Nalu töḱ yam rangah in bë basap Satan gekevoh yi huk na.

⁹ Mehö sën tu Anutu nalu lo, og su nesepa loḱ ngaa nipaya rë. Gaḱ Anutu vong beni nebë yi, om su yoh vu bë sepa doḱ ngaa nipaya rë, in tu Anutu nalu.

¹⁰ Nabë hil nehevongin bë ajaḱ Anutu nalu lo nij, gajaḱ Satan nalu lo nij, og hil ajaḱ nij nabë sënë: Alam sën su denevongŋŋaa nivesa rë lo, og su Anutu-yi-alam sir rë. Log alam sën su ahëj neving arij lo rë lo, og su Anutu nalu sir ving rë.

Aggata Sogek Sën Hil Ahëd Geving Arid Lo Lo

Nebë Sënë

¹¹ Ham ngo gagek sënë vu nyëdahis beyam bë: Hil ahëd geving hil vewen vewen.

¹² Hil su gevong ngaa nabë Kain. In Satan yi mehö yi, om sën sis ari mediik. Sis ari mediik degwa rak va? Degwa nebë yi mehö nesepa loḵ aggata nipaya, gari nesepa loḵ aggata niröpsën-yi.

¹³ Arig lo! Nabë alam sën denesepa loḵ aggata-dob-yi lo sënë degelë ham paya, og ham su gwelëk mejanga nemamin in ngaa saga.

¹⁴ Hil ahëd neving arid lo, om hil arak ni rak sënë bë: Hil hevu sën hil nadiik na veröḵ yi lo ya, gatöḵ yam sën hil medo malad-tumsën degwata lo. Gaḵ mehöti sën su ahë neving ari lo rë lo, og yö nahën nedo loḵ diiksën.

¹⁵ Mehöti sën nelë ari paya lo, og sënë nipaya böpata rot nebë sën sis yi mediik. Lob ham rak ni bë alam sën denesis mehönon medenediik lo, og mala-tumsën sën gevong behil medo degwata los degwata lo su neggëp vu sir rë.

¹⁶ Yesu diik loḵ yah hil bed in bë doḵ vu hil, lob hil arak ahëvingsën anon degwa ni rak sënë. Om yik hil geving. Hil dahun hil badok vu arid lo nabë saga, genabë hil nadiik og yik govek.

¹⁷ Rëḵ mu nabë mehöti yi ngaa dob sënë neggëp, lob lë gari ti rak vu in ngaa ti, rëḵ ruu demi vu ari sënë, gesu loḵ vu yi rak yi ngaa rë, loḵ nenër bë ahë neving Anutu in va?

¹⁸ Oo sa hurmahen lo, hil su ahëd geving arid lo jaḵ vengwëngsën los avid meris mu, gaḵ hil ahëd geving sir yönon begevong huk madok vu sir.

Alam Sën Denevong Ving Anutu Lo, Og Su Deneggöneng In Mala Rë

¹⁹ Nabë hil gevong nabë saga, og rëk tato vu hil nabë: Hil nesepa loḵ gägek anon yönon, genabë hil ayod neggëp nivesa, om hil su rëk agöneng in Anutu mala rë.

²⁰ Gaḵ nabë hil ayod nanër hil nabë hil nehevong ngaa nipaya, og hil kwad bo nabë Anutu og böpata kesuu hil ayod meneraḵ ngaa pin ni los degwa.

²¹ Sa mehö lo-e! Nabë hil ayod su nanër hil nabë hil nehevong ngaa nipaya rë, og hil su agöneng in Anutu mala.

²² Log ngaa sën hil neketag in vu yi lo, og nevong vu hil. In hil nesepa loḵ yi horek behil nehevong ngaa yoh vu sën ahë neving lo.

²³ Log yi horek nebë sënë: Hil gevong geving Nalu arë nabë yik yi Yesu Kerisi, gehil ahëd geving hil vewen vewen nabë sën nër vu hil vorot lo.

²⁴ Nabë mehöti sepa doḵ Anutu yi horek, og luho Anutu detu timu gAnutu nedo loḵ yi. Lob Anon Vabuung sën Anutu vong vu hil lo tato vu hil behil naraḵ ni bë Anutu nedo loḵ hil ayod.

4

Anutu Yi Anon Vabuung Ga, Memö Lo

¹ Oo sa mehö lo! Alam-gägek-kuungsën ngahiseḵë denedo yoh vu nyëg vu dob. Nebë saga, om ham su gwevong geving mehönnon pin sën denenër bë Anon Vabuung nedo loḵ sir lo. Gaḵ ham seggi ngaa sën nedo loḵ sir lo pin mejaḵ ni rë nabë Anon Vabuung sën neyam vu Anutu lo yönon ma ma.

² Log ham yoh vu bë jak ni nabë Anutu yi Anon Vabuung nedo loḵ mehöti og rëḵ nabë sënë: Alam pin sën denanër nabë Yesu Kerisi tu mehönon raḵ meyam dob lo og Anutu yi Anon Vabuung nedo loḵ sir.

³ Gaḵ alam pin sën su denenër nebë agi rë lo, og ngaa sën nedo loḵ sir lo su yam vu Anutu rë. Gaḵ yam vu mehö sën vongin bë dahun Kerisi na, beham ngo bengö wirek bë rëḵ nam lo. Lob gwëbeng yam ggovek ya benedo dob.

⁴ Oo sa hurmahen lo! Anutu yi ngaa ham, lob ham dahun alam-gagek-kuungsën lo ggovek ya. In Anon Vabuung sën nedo loḵ ham aga kesuu Memö Nipaya sën nedo loḵ alam vu dob agi.

⁵ Alam-gagek-kuungsën sën aga, og denesepa loḵ aggata-dob-yi. Lob hir gagek pin og yik denenër ngaa-dob-yi mu, lob alam sën denesepa loḵ aggata-dob-yi lo denebë nengaj vu ayej.

⁶ Gaḵ hileḵ Anutu yi ngaa hil. Om mehöti sën neraḵ Anutu ni lo, og nebë nenga vu hil gagek. Gaḵ mehöti sën su Anutu yi mehö yi rë lo, og su nebë nenga vu hil ayed rë. Yik hil ngo rëḵ ajak Anon Vubuung gagek-anon-yi ni, gajak memö gagek-kuungsën-yi ni jak ngaa nabë sënë.

Ahëvingsën Degwa Sogek Anutu

⁷ Oo sa mehö lo! Hil pasang ahëd geving hil vewen vewen. In sën hil ahëd geving alam lo, og degwa vu Anutu. Om mehö sën nesepa loḵ aggata-ahëvingsën-yi lo, og Anutu nalu yi beneraḵ Anutu ni yönon.

⁸ Gaḵ mehö sën su ahë neving ari lo rë lo, og yi dugin Anutu, in ahëvingsën degwaseḵe Anutu.

⁹ Anutu yik nalu perurek timu nedo, lob vong luk yam dob in bë doḵ vu hil behil medo maladtumsën jak yi. Lob sënë tato vu hil bë Anutu ahë neving hil.

¹⁰ Ahëvingsën degwa nebë sënë: Anutu su ahë neving hil in hil ahëd neving yi mugin rë. Gaḵ yö ahë neving hil mugin bevong Nalu luk yam dob in bë natu seriveng doḵ nah hil bed, bekevoh hil ngaa nipaya na.

¹¹ Oo sa mehö lo! Ngaa sënë tato vu hil bë Anutu ahë neving hil pangsen rot, om yik hil gevong nabë saga behil ngo ahëd geving hil vewen vewen.

¹² Mehöti su mala rak Anutu rë. Rëḵ mu nabë hil ahëd geving hil vewen vewen, og Anutu rëḵ medo doḵ hil ayod, lob mëm hil rëḵ ahëd geving hil niröp rot nabë sën Anutu ahë neving hil lo.

¹³ Vo yö yi Anon Vabuung vu hil, lob hil narak ni rak sënë bë hil los Anutu atu timu, genedo loḵ hil ayod.

¹⁴ He halë rak malamin bë Ama vong Nalu luk yam dob in bë geḵo alam vu dob nah vu yi, om sën he nanër gagek sënë rangah.

¹⁵ Nabë mehöti nanër rangah nabë Yesu sënëḵ Anutu Nalu, og Anutu nedo loḵ mehö saga, geluho mehö saga detu timu.

¹⁶ Lob hil arak ni benehevong ving bë Anutu ahë neving hil. Ahëvingsën degwaseḵë Anutu, log mehöti sën nesepa loḵ aggata-ahëvingsën-yi lo, og luho Anutu detu timu gAnutu nedo loḵ ayo.

¹⁷ Nabë hil medo dob sënë begevong ngaa nabë Kerisi, og hil arak ni bë hil nesepa loḵ aggata-ahëvingsën-yi niröp rot. Om hil su rëḵ agöneng in buk böpata sën nyëvewen-yi lo rë.

¹⁸ Nabë hil ahëd geving yönon, og hil su rëk agöneng rë. Yönon, nabë hil sepa dok aggata-ahëvingsën-yi niröp rot, og saga rëk juuk ggönengsën na. Ggönengsën degwa nebë mehönon kwaj nevo bë rëk denatök jak hir ngaa nipaya nyëvewen. Om nabë mehöti nahën neggöneng, og hil narak ni bë su nesepa lok aggata-ahëvingsën-yi niröp rot rë.

¹⁹ Ahëvingsën neggëp vu hil in degwa rak sën Anutu yö ahë ving hil mugin lo.

²⁰ Nabë mehöti nanër nabë ahë neving Anutu, lok hil halë bë nelë ari paya, og mehö saga yö kuung rak. In lë ari rak mala rëk su ahë neving yi rë, om su yoh vu bë rëk ahë geving Anutu sën su lë rak mala rë lo.

²¹ In hil haço horek sënë vu Kerisi bë: Mehöti sën ahë neving Anutu lo, og yik ahë geving ari lo geving nabë saga.

5

Alam Sën Denevong Ving Lo, Og Denedahun Ngaa-dob-yi Ya

¹ Alam sën denevong ving Yesu bë yi mehö sën Anutu ggoin rak in bë geço hil nah lo, og alam saga detu Anutu nalu. Log alam sën ahëj neving Anutu lo, og ahëj neving nalu lo pin ving.

² Om nabë hil ahëd geving Anutu besepa dok yi horek, og saga tato vu hil bë hil ahëd neving Anutu nalu lo ving.

³ Bë hil ahëd neving Anutu, og hil rëk sepa dok yi horek, lob yi horek su rëk maggin vu hil rë.

⁴ In alam pin sën denetu Anutu nalu lo, og denevuu ngaa-dob-yi ya. Log sën yik hil ayod neya timu vu Kerisi lo og vong behil hevuu ngaa-dob-yi ya gehil nare nidwëek.

⁵ Mehö nebë tena nevuü aggata-dob-yi ya genare niwëek-a? Gaḵ yik mehö sën nevong ving Yesu bë Anutu Nalu lo.

Anutu Nër Nalu Yi Gagek Rangah

⁶ Yik Yesu Kerisi sënë sën yam los bël-ripeksën-yi lo, geyam in bë keseh köḵ jaḵ kelepeḵo*. Su bël mu tateḵin yi rangah rë, gaḵ bël los köḵ detateḵin yi rangah loḵ ti. Lob Anon Vabuung tateḵin gagek raḵ Kerisi ving, in Anon Vabuung og mehö gagek-anon-yi.

⁷ Sir löö sënë denetateḵin yi rangah:

⁸ Anon Vabuung, gebël, geḵöḵ, lob yik lööhoho denenër gagek neggëp ti.

⁹ Hil nehango gagek sën mehönon denenër vu hil lo benehevong ving, rëḵ mu gagek sën Anutu nenër lo kesuu gagek sën mehönon denenër agi. Lob gagek sën Anutu nër agi, og yik gagek sën netateḵin Nalu rangah lo.

¹⁰ Mehöti sën ayo neya timu vu Anutu Nalu lo, og raḵ ni loḵ ayo bë gagek sën Anutu nër agi og yönon. Gaḵ mehöti sën su ayo neya timu vu Anutu rë lo, og sagraḵ nenër bë Anutu mehö gagek-kuungsën. In su nevong ving Anutu Nalu yi gagek anon sën Anutu yö tateḵin rangah lo rë.

¹¹ Gagek anon sën Anutu nër agi nebë: Anutu vo mala-tumsën degwata los degwata vu hil, degwa raḵ Nalu.

¹² Mehöti sën yö negga rak Anutu Nalu rot lo, og mala-tumsën neggëp vu yi. Gak mehöti sën nedo ading in Anutu Nalu lo, og mala-tumsën sënë su neggëp vu yi rë.

Hil Ajak Ni Nabë Hil Rëk Medo Malad-tumsën Degwata

¹³ Sa kevu gagek sënë yök vu ham, in bë ham sën ham nevong ving Anutu Nalu arë lo jak ni borot nabë ham ko mala-tumsën degwata los degwata yök vu ham ggovek ya.

¹⁴ Bë hil ketag ngaa ti vu Anutu, og hil su agöneng in yi, in hil narak ni vorot bë: Nabë hil ketag noh vu sën kwa nevo lo, og rëk gebë nenga vu hil.

¹⁵ Yönon, hil arak ni vorot bë nebë nenga vu hil in ngaa pin sën hil neketag vu yi in lo, om hil ajak sënë ni geving nabë vong ngaa sën hil ketag in vu yi lo vu hil ggovek ya.

¹⁶ Bë mehöti lë gari vong ngaa nipaya ti, rëk mu ngaa nipaya sënë su yoh vu bë gevong bari sënë na mala nama dok Nyëg Nipaya rë, og najom jak vu Anutu in yi, lob Anutu rëk gevong bemedo mala-tumsën. Yik senër alam sën denevong ngaa nipaya sën su yoh vu bë gevong bemalaj nama dok Nyëg Nipaya rë lo. Gak ngaa nipaya sën rëk gevong bemehönon malaj nama dok Nyëg Nipaya lo, og sa su nër rak saga bë ham kwetag in rë.

¹⁷ Ngaa pin sën su neyoh vu rë lo, og sagak ngaa nipaya pin. Rëk ngaa nipaya vahi og su nevong bemehönon malaj nema verök yi lok Nyëg Nipaya rë.

¹⁸ Hil arak ni bë alam pin sën detu Anutu nalu lo, og su denesepa lok ngaa nipaya rë. Gak Anutu

Nalu nemalain sir nivesa, om Satan su yoh vu bë gebë nema jaḵ sir rë.

¹⁹ Hil naraḵ ni bë hil atu Anutu nalu lo, gaḵ Satan tu mehōnon sën denesepa loḵ aggata-dob-yi lo pin alaj.

²⁰ Hil arax ni bë Anutu Nalu yam ggovek ya, lob tateḵin hil kwad in bë hil ajaḵ Anutu soḡek ni rot. Lob hil los Anutu soḡek atu timu, in hil los Nalu Yesu Kerisi atu timu ggovek ya. In Nalu og yik yi Anutu soḡek, bemala-tumsën degwa neggëp degwata los degwata vu yi.

²¹ Oo sa hurmahen lo! Ham gwegin ham vu anutu-kuungsën.

Gagek Mewis
The New Testament in the Central/Mapos dialect of the
Buang language of Papua New Guinea
Nupela Testamen long tokples Buang Mapos long
Niugini

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 18 Apr 2025 from source files dated 31 Aug 2023

18a972db-abcc-5dc3-9031-f1d4455b33c3